

CXLI

1410-VII-16, Antequera.— Juan II al Concejo de Murcia para que recojan las monedas del pedido que se le deben para poder pagar a los que estan en la guerra contra los moros. (A.M.M. Cart. Real 1391-1412, fol. 130 r-v)

Don Juan por la graçia de Dios rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, e de Algezira, e señor de Vizcaya e de Molina; a los conçejos, e alcalles, e alguaziles e cavalleros, e escuderos, e regidores, e ofiçiales, e omes buenos de las çibdades de Cartagena e Murçia, e a todos los otros conçeios, e alcalles, e alguaziles, e otros ofiçiales qualesquier de todas las villas e lugares de su obispado e reyno en esta mi carta contenidas que esta mi carta vieredes o el traslado della signado de escrivano publico, salud e graçia.

Bien sabedes en como en el ayuntamiento que yo mande fazer en la muy noble çibdat de Cordova este año en que estamos de la data desta mi carta fue ordenado e otrogado por el Infante don Ferrando mi tio, mi tutor e regidor de los mis regnos, e por los condes e ricos omes, cavalleros del mi consejo e procuradores de algunas çibdades e villas de los dichos mis reynos que con él estavan que para pagar sueldo a las gentes que con el dicho Infante mi tio estan, e para las otras cosas nesçesarias que son menester para esta guerra que yo he con los moros henemigos de la fe, que eran menester para fasta fin del mes de Março primero que viene demas de los maravedis que en los años pasados avian quedado treynta e çinco cuentos de maravedis que me los diesen en pedido e monedas, segund aqui dira, en pedido diez e siete cuentos e medio, e treze monedas, e que se cogiesen las dichas treze monedas en esta guisa: quatro en el mes de Mayo que paso, e las seys en los meses de Junio e Jullio, en cada mes tres monedas e las dos en el mes de Agosto, e la una en el mes de Setiembre, el dicho pedido que lo pagasen en los de Setiembre e Octubre e Novienbre, en cada mes la terçia parte, e agora sabed que por quanto a las gentes de cavallo e de pie asy omes de armas e ginetes e vallesteros e lançeros que con el dicho Infante mi tio, que esta sobre la villa de Antequera que tiene çerrada son devidos muchos maravedis del tiempo pasado e han de aver de cada dia e de las dichas monedas non son cobrados maravedis algunos, lo uno porque aun non son arrendadasde lo çierto dellas e por otro se cobran pocos maravedis fue mi merçed que las siete monedas que en los dichos meses de Mayo e de Junio pasados mande coger que se pagasen el respecto que lo dieren e pagaron por cada una de las quinze monedas del año pasado de mill e quatroçientos e nueve años e que fuesen descontados dellos los maravedis que montasen lo çierto dellas fuese cogido a los que los pagado.

E otrosy, quel pedido que era acordado que se pagase en los meses de Setiembre e Otubre e Novienbre en cada mes la terçia parte que se paga en este



mes de Jullio en que estamos, e en los meses de Agosto e Setienbre e Octubre siguientes en cada mes la quarta parte, el qual dicho pedido mande fazer repartimiento por todas las çibdades e villas e lugares descontados los maravedis que cabrian a pagar a las personas francas que non pagan pedido en estas dichas çibdades e villas e lugares las quantias de maravedis que aqui dira en esta guisa: A los conçejos de la çibdat de Cartagena çinco mill e çiento e veynte e ocho maravedis; a vos, el conçejo de la çibdat de Murçia, noventa e tres mill e dozientos e quarenta maravedis; a vos, el conçejo de Libriella, mill e seteçientos e setenta e seys maravedis; a vos, el conçejo de Mula, ocho mill e ochoçientos e ochenta e una maravedis; e a vos el conçejo de Hellin, diez e seys mill e lochoçientos e setenta maravedis; a vos, el conçejo de Tovarra, siete mill e çiento e çinco maravedis; a vos, el conçejo de Chinchilla, çinquenta e tres mill e dozientos e ochenta e ocho maravedis; a vos, el conçejo de Alhama, mill e trezientos e treynta maravedis; a vos, el conçejo de Molina Seca, quatro mill e ochoçientos e ochenta e tres maravedis; e vos el conçejo de Jumiella, çinco mill e seteçientos e setenta e çinco maravedis; a vos el conçejo de Yecla, siete mill e çiento e çinco maravedis; a vos, el conçejo de Montealegre, quatroçientos e quarenta e seys maravedis; a vos, el conçejo de Villena, veynte e dos mill e çiento e noventa e nueve maravedis; a vos, el conçejo de la villa de Sax, mill e seteçientos e setenta e seys maravedis; a vos, el conçejo de Almansa, catorce mill e dozientos e diez maravedis; a vos, el conçejo de Carçelen, quatroçientos e quarenta e seys maravedis; a vos, el conçejo de Vez, quatro mill e dozientos e sesenta e un maravedis; a vos, el conçejo de Alcalá del Rio, siete mill e çiento e çinco maravedis; a vos, el conçejo de Xorquera, siete mill e noveçientos e ochenta e nueve maravedis; a vos el conçejo de Alvaçete con la Gineta, diez e ocho mill e seysçientos e quarenta e seys maravedis.

Porque vos mando, vista esta mi carta o el dicho su traslado signado como dicho es, que luego en punto syn otro detenimiento ni tardança alguna repartades entre vos los dichos vezinos e moradores de las dichas çibdades e villas e lugares del dicho obispado e reyno las quantias de maravedis que es esta mi carta van declaradas e nonbradas que asy vos caben a pagar en todo el dicho pedido de los dichos dies e siete cuentos e medio de maravedis que asy es mi merçed que paguedes en los dichos meses de Jullio, e Agosto, e Setienbre e Octubre deste dicho año, cada mes la quarta parte e los fagades luego coger e pagar, e los dedes e entreguedes a Nicolas Martinez mi contador mayor de las mis cuentas e mi thesorero mayor del dicho pedido e monedas de los reynos de Toledo e del Andalozia e de Murçia e a los que lo ovieren de recabdat por él, tomad sus cartas de pago e con esta mi carta o con el dicho su traslado signado como dicho es mando que vos sean resçevidos en cuenta los que los dichos maravedis que vos asy caben a pagar del dicho pedido, es mi merçed que los paguedes e paguen todas las personas e vezinos e moradores desas dichas çibdades e villas e lugares del dicho obispado e reyno asy exentos como non esentos salvo los clerigos de misa e de orden sacra, en tal manera que dedes cogidos e pagados al dicho Nicolas Martinez mi thesorero o a los que lo ovieren de recabdar por él, a los



dichos plazos en la manera que dicha es, e los unos e los otros non fagades ende al por alguna manera so pena de la mi merçed e de diez mill maravedis a cada uno de vos para la mi camara, e de mas sed çiertos que sy por vos non conplir e pagar los dichos maravedis a los plazos algund deserviçio me viniere que a vos e a lo que avedes me tornare por ello e por esta carta o por el dicho su traslado signado de escrivano publico como dicho es doy poder conplido al dicho Nicolas Martinez mi thesorero, o a los que por él lo ovieren de aver e de recabdar, que vos prendan los cuerpos do quier que vos pudieren aver e vos lieven de un lugar a otro sy quisieren, e vos tengan en su poder a do ellos quisieren bien presos e recabdados e en tanto que entren en vuestros bienes muebles e rayzes do quier que los fallaren e los lieven los muebles de un lugar a otro e los vendan donde quisieren segund por maravedis del mi aver e de los maravedis que valieren que se entreguen de todos los dichos maravedis que asy avedes a pagar del dicho pedido en la manera que dicha es, con las costas que sobre esta razon fizieren a vuestra culpa en los cobrar, e mando a todas las justiçias e otros ofiçiales qualesquier de las dichas çibdades e villas e lugares que cunplan todo lo que sobre dicho es, e vos ayuden a todo lo que vos el dicho thesorero o lo que por vos los ovieren de recabdar les dixieren de mi parte que avedes menester su ayuda so privaçion de los ofiços que de mi tienen por qualesquier manera, e do poder los bienes que ovieren e mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como se cunple mi mandado.

Dada en el Real de Sobre Antequera, diez e seys dias de Jullio año del nascimiento del nuestro Salvador Ihesuchristo de mill e quatroçientos e diez años. Yo el Infante. Yo Gutier Diaz la fiz escrivir por mandado del señor Infante tutor de nuestro señor el rey e regidor de sus regnos. E en las espaldas de la dicha carta estavan escriptos estos nonbres: Diego Ferrandez, Anton Gomez, Sancho Ferrandez.

CXLII

1410-VII-30, Antequera.— Juan II al Concejo de Murcia para que terminen de coger las últimas monedas que le deben. (A.M.M. Cart. Real 1391-1412, fols. 129v -130r)

Don Iohan por la graçia de Dios rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina; a los conçejos, e alcalles, e alguaziles e cavalleros, e escuderos, e regidores, e ofiçiales, e omes buenos de las çibdades de Cartagena e Murçia, e a todos los otros conçejos, e alcalles, e alguaziles, e otros ofiçiales

